

समे – 12:25

<><><><><><>

PM-SIH 2024

प्रधानमंत्री नरेन्द्र मोदी होरें आखेआ ऐ जे सरकार नोजवानें गी उंदिएं आसें—तागें उत्सुकता ते सुखने गी सच्च करने च समर्थन देने लेई बक्ख—बक्ख सुधारें राएं उंदी बत्तै चां दिक्कतें रूकावटें ते अड़चने गी दूर करा करदी ऐ। कल स्मार्ट इंडिया हैखाथान दे ग्रैंड फिनाले दरान युवा इनावेटरें कन्नै गल्ल करदे होई मोदी होरें आचोआ जे अज्जै दा नोजवान मुल्खै दे सामले खड़ी चुनौतिएं दा मकाबला करना ते उंदा हल्ल तुप्पी कड़्डने गी अपने जिम्मेवारी समझा करदा ऐ। प्रधानमंत्री होरें आखेआ जे दुनिया दा भविक्ख, ज्ञान ते नमिएं काह्डें पर आधारित ऐ ते भारतीय नोजवान एह्दे च प्रमुखता कन्नै योगदान देने लेई तैआर न।

<><><><><><>

Jammu SIH

स्मार्ट इंडिया हैखाथान 2024 दा साफ्टवेयर संस्करण अज्ज आईआईटी जम्मू च मुक्का करदा ऐ जित्थें युवा इनोवेटर मजूदा दौर दिएं चुनौतिएं कन्नै पिबड़ने लेई अपनियां काह्डां लेइयै आए दे न। “सृजन की शक्ति, नवाचार का आधार” विषय कन्नै इस हैखाथान दी शुरूआत कल होई ही। एह् आयोजन नमें इनोवेटरें गी कृषि, साइबर सुरक्षा, स्मार्ट सिटी, टिकाऊ विकास ते सेहत दिक्खभाल दे क्षेत्र च चुनौतिएं दा हल्ल तुप्पी कड़्डने दा मौका दिंदा ऐ। आईआईटी जम्मू दे निदेशक प्रो. डंदवी सिंह गौर होरें कल पैहने रोज नोजवानें गी आर्टिफिशल इंटेलीजेंस दा इस्तेमाल दुनिया दे सामने दरपेश समस्याएं दे नबेड़े लेई करने लेई प्रेरत कीता।

<><><><><><>

Parliament Session

राज्यसभा च बिरोधी धड़ें दिएं पार्टिएं आस्सेआ पाई गेदी डंड रौली दे चलदे सदन दी कारवाई दपैहरी 2 बजे तगर स्थगित रिं दित्ती गई ऐ। अज्ज बडलै जिसलै सदन च मिंबर किट्ठे होए तां विपक्षी पार्टिएं स्थगन प्रस्ताह् रखेआ जिसी सभापति होरें खारज करी दित्ता।

एहदे बाद विपक्ष नै रौली पाना शुरू करी दित्ता ते बार बार ठाकने दे बाद जिसलै उनें रौली बंद नेई कीता तां सदन दी कारवाई दिने 2 बजे तोड़ी स्थगित करी दित्तह गई। बीजेपी दे राष्ट्रीय प्रधान ते सेहत मंत्री जे.पी.नड्डा होरें इंडी गठबंधन आस्सेआ संसद भवन परिसर च विरोध प्रदर्शन दी निंदेया करदे होई आखेआ जे विपक्ष संसद दी गरिमा गी ढेह पजाने दा कम्म करा करदा ऐ जेहड़ी जे इ कमंदे भागे आली गल्ल ऐ।

<><><><><><><>

Reasi Hideout

रियासी जिले च आतंकवाद रोधी अभियान तैहत् कीती गेदी इक सांझी तुपाई कारवाई दरान सुरक्षाबलें आतंकवादिएं दे छप्पने आली इक थाहरे दा पता लाइयै खरी मात्रा च थेआर, असलाह ते गोलीबरूद बरामद कीता ऐ। आकाशवाणी दे जम्मू संवाददाता नै जानकारी दित्ती ऐ जे सुरक्षा बलें जिले दी माहोर तैहसील दे लापरी इलाके च इस ठकाने गी तबाह करियै उत्थुआं इक एके-47, असला रैफल, एके-47 दियां त्रै मैगजीनें सनें दऊं पस्तोलां, एके-47 दे 511 रौंद, पस्तोल दे 14 रौंद, 4 हैंडग्रनेड ते इक पिट्टू बैग बरामद कीता ऐ। इस बरामदगी दे बारे मामाला दर्ज करियै जांच शुरु करी दित्ती गेदी ऐ।

<><><><><><><>

Kovind-ONOE

साबका राष्ट्रपति रामनाथ कोविंद होरें आखेआ ऐ जे “इक राष्ट्र इक चुनां” आले सरिस्ते च भारत दी जीडीपी च इक कोला लेइयै डेढ़ फीसदी दा बाद्धा करने दी समर्थ ऐ। “इक राष्ट्र इक चुनां” दी हिमायत करदे होई साबका राष्ट्रपति ते ओएनओई कमेटी दे अध्यक्ष होरें आखेआ जे एह मुख्ये लेई इक बड़्डी तब्दीली होग। श्री कोविंद होरें कानपुर च पत्रकारें कन्नै गल्लबात करदे होई आखेआ जे केन्द्र सरकार “इक राष्ट्र इक चुनां” प्रणाली गी लागू करने लेई सैहमति बनाव। मुख्ये च राज्य दी असेंबलियें ते लोकसभा दे चुनां इक्कै समें च कराने दी समर्थन करदे होई श्री कोविंद होरें आखेआ जे एह मुद्दा राष्ट्र दे हित च ऐ। केन्द्री मंत्रिमंडल ने इस बरे सितम्बर च “इक राष्ट्र इक चुनां” सरबन्धी पैहलकदमी गी मंजूरी दित्ती ऐ।

<><><><><><><>

Mughal Road-Closure

जम्मू कश्मीर दे जम्मू संभाग दे बन्ने कन्नै लगदे राजौरी ते पुंछ जिले च कश्मीर घाटी दे शोपिया जिले कन्नै जोड़ने आली मतवादल जरनैली शिड़क ताजा बर्फबारी दे बाद गडिडएं दी आओजाई लेई बंद करी दित्ती ऐ। पुंछ दे डीएसपी ट्रैफिक शिव कुमार हुंदे मूजब पीर की गली सनें पीर पंचाल दिएं उप्परतिएं धारें पर ताजा बर्फबारी होई ऐ। उआं उनें आखेआ जे सड़कै परा बर्फ हटाने दा कम्म जारी ऐ ते रस्ता साफ होई जाने दे बाद इसी गडिडएं दी आओजाई लेई खोल्ली दित्ता जाग।

<><><><><><>

Kashmir-Sonzal Fest

सलाना कला ते सांस्कृति उत्सव “सोंजल-2024” अज्ज कश्मीर यूनिवर्सिटी च शुरू होआ’रदा ऐ। 9 दिनें तोड़ी चलने आले इस उत्सव च विद्यार्थी खित्ते दे सगोसार सांस्कृतिक विरसे ते कलाएं दा प्रदर्शन करगंन। यूनिवर्सिटी दी युवा मसमले सरबंधी डिवीजन दे बैनर हेठ इस उत्सव दा उद्घाटन उच्च शिक्षा मंत्री सकीना मसूद इत्तू होर, वाइस चांसलर प्रो. निलोफर खान हुंदी मजूदगी च करगंन। इस उत्सव च कश्मीरी नोजवानें दी सृजनात्मक कला, प्रतिभा ते समर्था दा नंद ठोआने लेई बड़ी मती गिनतरी च लोकें दे औने दी मेद ऐ।

<><><><><><>

Khelo India Winter Games

2025 ब’रे दियां खेलो इंडिया स्यालू खेड्डां दऊं बक्ख-बक्ख गेडें च लद्दाख ते जम्मू कश्मीर च कराइयां जांगन। लद्दाख 23 कोला लेइयै 27 जनवरी तगर आइस स्कींग ते आइस हॉकी जनेए बर्फू पर खेड्डे जाने आले आयोजनें दी मेजबानी करोग जिसलै जे 22 कोला 25 फरवरी तगर जम्मू कश्मीर च एलपाइन स्कींग, नार्डिक स्कींग, स्की माउन्टेनरिंग, स्नोबोर्डिंग जनेए खेड्डें दा सरिस्ता कीता जाग। केन्द्री खेड्ड मंत्री डॉ. मनसुख मांडविया होरें इनें औंदे आयोजनें गी लेइयै खुशी ते उत्साह प्रगट कीता ते 2026 ब’रे च होने आले स्यालू ओलंपिक्स लेई अपने खडारी तालने च इनें आयोजनें दे महत्व गी उजागर कीता। उनें आखेआ जे खेलो इंडिया स्यालू खेड्डें दा मकसद गै बड्डे ते अंतर्राष्ट्रीय सतह मकाबले लेई खडारिं दी पंछान ते ताल करना ऐ। स्यालू खेड्डें दा आयोजन लद्दाख च दूई बारी होने जा’रदा ऐ। 2024 दिएं खेलो इंडिया स्यालू खेड्डें कोला पैहले सारे आयोजनें दी मेजबानी जम्मू कश्मीर गै करदा हा।

<><><><><><>

JK-Weather

मौसम विभाग नै समूलचे जम्मू कश्मीर च 18 दिसम्बर तोड़ी सुक्की ठंड पौंदे रौहने दे असार दस्से न। जम्मू च घट्टोघट्ट तापमान 5 डिग्री सैलिसयस दे आले दोआले चलै करदा ऐ ते जंदी रातीं दा घट्टोघट्ट तापमान 5.4 डिग्री सैलिसयस रिकार्ड कीता गेआ जिसलै के दिने दे बद्धोबद्ध तापमान कल 19.9 डिग्री रेआ।

<><><><><><>